

**Illoqarfinni anginerni sisamani nalinginnaasumik attartortittakkanik  
inissialiortiternissamik ukiuni 2010-mit 2020-imut pisariaqartinneqartut pillugit  
Naalakkersuisut nassuiaammik saqqummiussaqaarnissaannik Inatsisartut  
aalajangiussinissaannik siunnersuut. Nassuiaat upernaakkut 2010-mi  
saqqummiunneqassaaq.**

(Inatsisartunut ilaasortaq Olga P. Berthelsen, Inuit Ataqtigiit)

**pillugu**

**Ineqarnermut Attaveqarnermullu Ataatsimiititaliap**

**ISUMALIUTISSIISSUTAA**

**Aalajangiiffigisassatut siunnersuutip aappassaaneerneqarnerani saqqummiunneqartoq**

Ataatsimiititaliap kingullermik suliarinninnermini ukuningga inuttaqarpoq:

Inatsisartunut ilaasortaq Justus Hansen, Demokraatit, siulittaasoq

Inatsisartunut ilaasortaq, Olga P. Berthelsen, Inuit Ataqtigiit, siulittaasup tullia

Inatsisartunut ilaasortaq Anders Olsen, Inuit Ataqtigiit

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinguaq Olsen, Siumut

Ulloq 22. oktober 2009-mi siullermeerinerup kingorna ataatsimiititaliap siunnersuut erseqqinnerusumik naliliiffigaa, imalu oqaaseqaateqarniarluni:

**Siunnersuutip tunuliaqutaa imarisaalu**

Ineqarnermut politikimik ullutsinnut naleqquttumik ungasissumullu isigisumik suliaqarnissamut ilisimasatigut tunuliaqutissat pisariaqartut ullumikkut amigaatigineqarnerat nassuerutigineqartariaqartoq siunnersuuteqartoq isumaqarpoq. Taamaattumillu nunatsinni illoqarfinni anginerni inissianik nalinginnaasumik attartortittakkanik tamakkiisumik pisariaqartitsinerup qulaajarnissaa pisariaqartoq siunnersuuteqartoq isumaqarpoq. Tassunga atatillugu innuttaasut nuttarnerat siunissami qanoq ingerlasussatut naatsorsuutigineqarsinnaanersoq ilanngullugu misissorneqartariaqartoq siunnersuuteqartoq isumaqarpoq.

Taamaattumik illoqarfinni anginerni inissianik nalinginnaasumik attartortittakkanik pisariaqartitsineq pillugu ataatsimoortumik nassuiaasiornissamat Naalakkersuisut peqquneqarnissaat siunnersuuteqartup siunnersuut matumani pineqartoq aqputigalugu kissaatigaa. Illoqarfinni anginerni inissiat nalinginnaasumik attartortittakkat pigineqartut taakkuninngalu pisariaqar-

titsineq imminnut qanoq naapertuunnerusumik oqimaaqatigiissaariffigineqarsinnaanersut pillugu aningaasaqarnikkut isumaliutit siunnersuutillu nassuiaammi ilanngunneqassasut siunnersuuteqartup aamma kissaatigaa. Kiisalu inissianik nalinginnaasumik attartortittakkanik nutaanik sanaartornissamut atatillugu aningaasalersueriaatsit allat atorneqarsinnaasut pillugit siunnersuutiniq nassuiaammi saqqummiussisoqarnissaa siunnersuuteqartumit kissaatigineqarpoq.

### **Siunnersuutip suliarineqarnera**

Siunnersuutip siullermeerneqarnerani Inatsisartuni amerlanerussuteqartut siunnersuut taperseeraat ataatsimiititaliap maluginiarpa.

Nassuiaasiornissaq nassuiaatilluunniit taassuma 2010-mi upernaakkut ataatsimiinnermi Inatsisartunut saqqummiunneqarnissaa akerlerineqanngitsoq ataatsimiititaliap maluginiarpa. Siunnersuummili piffiit aalajangersimasut kisimik pineqarnerat, tassalu illoqarfiit sisamat anginerit kisimik nassuiaammi ilaatinneqarnissaat isumaqatigineqanngilaq.

Aalajangiiffigisassatut siunnersuut taperserneqassasoq Naalakkersuisunit kaammattuutigineqarpoq. Ineqarnermut tunngasuni sanaartornermut aningaasaliussat ungasissumut isigisumik anguniagaqarfiunissaat Naalakkersuisunit kissaatigineqarpoq, tamatumanilu nassuiaat peqataaqataasinnaavoq.

### **Ataatsimiititaliami ikinnerussuteqartoq Siumumeersoq siunnersuut pillugu ima oqaaseqaateqarumavoq:**

Nunarput tamaat ilanngunneqanngimmat siunnersuut maanna ilusimisut iluseqartoq Siumumit taperserneqarsinnaanngilaq. Siunnersuut illoqarfinnut sisamanut anginernut taamaallaat tunngamat Atassummit naapertuussorineqanngilaq, Siumullu assigalugu kissaatigineqarluni misissuinermi nunarput tamarmi ilaatinneqassasoq. Inissianik pisariaqartitsineq illoqarfinni sisamani taaneqartuni kisimi atuutinnitsoq aammali illoqarfinni nunaqarfinnilu allani amerlasuuni atuuttoq ikinnerussuteqartoq isumaqarpoq. Inissianik pisariaqartitsineq nunatsinni tamarmi atuuttoq ikinnerussuteqartup erseqqissarpaa, aamma piffinni suliffissaqarnerpaaffiunngikkaluartuni.

### **Tamanna tunngavigalugu ikinnerussuteqartoq siuliani taaneqartoq allannguutissatut siunnersuummik imaattumik saqqummiussivoq:**

**Nuna tamakkerlugu 2010-2020-imi inissianik nalinginnaasumik attartortittakkanik pisariaqartitsineq pillugu nassuiaammik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UPA 10-mi saqqummiunneqassaaq.**

**Ataatsimiititaliami amerlanerussuteqartut Inuit Ataqtigiinneersut Demokraatineersullu siunnersuut pillugu ima oqaaseqarumapput:**

Illoqarfinni anginerni sisamani pisariaqartitsinerup annertunerunera tunngavilersuutigalugu amerlanerussuteqartut siunnersuut taperserpaat. Taakkunanissaaq inuussutissarsiornikkut periarfissat, taamaalillunilu aamma suliffissaqarnissamut periarfissat annertunerupput. Piffiit allat ilanngullugit misissuisinnaaneq pissusissamisoortuussasoq, misissuinerli taamaattoq immikkut ingerlanneqartariaqartoq amerlanerussuteqartut isumaqarput. Tamanna siunnersuummut matumunnga atatillugu Naalakkersuisut nassuiaataannut nangissutitut ingerlanneqarsinnaavoq imaluunniit assersuutigalugu Naalakkersuisut immikkoortunut periusissanik pilersaarusiernerannut atatillugu ingerlanneqarsinnaalluni. Taamaattumik siunnersuummut maanna ilusimisut iluseqartumut amerlanerussuteqartut tapersiinerat ima paasineqassanngilaq nunap sinnera puigorneqartoq, tassaallunili suliassaqarfimmi ataatsimoortumik tulleriiarisogarnissanik kissaateqarneq.

**Tamanna tunngavigalugu ataatsimiititaliami amerlanerussuteqartut siuliani taaneqartut siunnersuut Inatsisartunit akuerineqassasoq inassutigaat:**

Taama oqaaseqarluni Ineqarnermut Attaveqarnermullu Ataatsimiititaliap inatsisissatut siunnersuut Inatsisartunut aappassaaniigassanngortippaa.

---

Justus Hansen,  
Siulittaasoq  
Demokraatit

---

Olga P. Berthelsen,  
Siulittaasup tullia  
Inuit Ataqtigiit

---

Anders Olsen  
Inuit Ataqtigiit

---

Kim Kielsen,  
Siumut

---

Akitsinnguaq Olsen,  
Siumut